

CONVENZION SUL FURLAN

Zûc di squadre tra Universitât e Arlef

EJE STADE INVIADÉ, LA convenzion stipulade tra la Universitât dal Friûl e l'Agjenzie regionâl pe lenghe furlane in materie di tutele de lenghe e culture furlane. Te suaze di un acuardi bienâl i doi ents a colaboraran par inviâ azions di caratar organizatîf, aministratîf e gjestionâl par atuâ une ativitât integrate di promoziun de lenghe furlane cun particolar riferiment ai setôrs scientifics e di ricercje.

La convezion, presentade ai 15 di Otubar, e proviôt la istituzion di un Comitât paritetico Arlef-Universitât di Udin che e varà il compit di davuelzi une stabile ativitât di coordinament tecnic scientific te programazion des azions comuns di puartâ indevant pe tutele e promoziun de lenghe furlane. A fasaran part dal Comitât il retôr e il diretôr gjenerâl de Universitât di Udin e il president e diretôr de Arlef. Un dependent dal cjamp de didatiche al sarâ comandât li de Arlef par garantî il coordinament des azions: «Chest acuardi – e à sotliniât la retore Cristiana Compagno – di une bande al à valôr politic e di chê altre al puartarà risultâts operatîfs aes dôs istituzions».

«Chesta convenzion cul Ateneu furlan –

al à evidenziât il president de Arlef, Lorenzo Zanon – e rispuint ae finalitât proviodude dal Statût de Agjenzie, che e à il compit di favorî la colaborazion jenfri organisims che a operin pe cognossince, difusion e valorizazion de lenghe furlane».

Ae presentazion al è intervignût ancje Giuseppe Napoli, vicediretôr centrâl Relazion internazionâls e comunitariis e responsabil dal Servizi corejonâi tal forest e lenghis minoritariis de Regjon, che al à ricuardât il percors inmaneât par dâ acet in Friûl ae Agjenzie europeane pes lenghis. Une candidature che e à vût la aprovazion de retore. Napoli al à ancje ricuardât il lavôr che a stan finint i professôrs Giovanni Frau e Federico Vicario pe armonizazion des variantis linguistichis dal furlan e la Conferenze regionâl de lenghe furlane che si tignarà ai 24 di Novembar.

Tal cercin de convenzion e je proviodude ancje la istituzion dal Servizi Arlef-Universitât di Udin pes ativitâts di ricercje su la lenghe furlane, finalizât a costituî un strument stabil di racuardi fra lis ativitâts di ricercje e promoziun linguistiche dai doi ents. Tra i compits dal Servizi a son proviodûts la assistence ai orghins di plui alt



Te foto parsore: Compagno e Zanon.

nivel dai ents che a partecipin ae convenzion par davuelzi ativitât di ricercje, politiche linguistiche e gjestion aministrative; davuelziment di ativitâts periodichis di analisi e verifiche des ativitâts di ricercje su la lenghe furlane; il scandai e la verifiche des azions proviodudis dal plan anuâl di politiche linguistiche de Arlef; la colaborazion te programazion di iniziativis culturâls a favôr de lenghe e de culture furlane ancje in comunitâts furlanis che a operin tal forest e in colaborazion cun altris istituzions.